

Staf UMSKAL ziarah golongan asnaf

UB 2-8-13 B5

KAKITANGAN Universiti Malaysia Sabah, Kampus Antarabangsa Labuan (UMSKAL) mengadakan program Ziarah Ramadan Kedua 2013 di lima buah kampung di Wilayah Persekutuan Labuan, kelmarin. Seramai 20 kakitangan yang mewakili semua bahagian di universiti itu

menyampaikan bantuan kepada golongan asnaf di Kampung Sungai Bangat, Bukit Kalam, Bukit Kuda, Ganggarak, Layang-Layangan dan Sungai Lada.

Mereka yang menaiki bas dan van itu menyerahkan wang tunai dan barang keperluan harian seperti beras hasil sumbangan kakitangan UMSKAL

kepada 17 penerima pada tahun ini.

Sumbangan disampaikan Penolong Pendaftar Kanan, Bahagian Hal Ehwal Pelajar dan Alumni (HEPA), Musnin Mattersah yang mewakili Pengarah UMSKAL, Prof Madya Dr Ismail Ali.

Turut menyertai rombongan UMSKAL itu ialah penyelaras program,

Che Din Md Salleh yang juga Penolong Pegawai Tadbir HEPA.

Musnin berkata, program itu diadakan untuk mendekati dan mengembirakan golongan asnaf untuk menyambut Hari Raya Aidilfitri pada tahun ini.

Beliau berharap sumbangan dan bantuan itu dapat mengurangkan beban penerima dan penjaga mereka pada bulan Ramadan dan Hari Raya Puasa nanti.

Katanya, ianya juga dapat beramah mesra dan berkenalan dengan pemimpin masyarakat terutama ketua kampung yang menjayakan program itu.

“Selain itu, program ziarah itu telah merapatkan hubungan silaturrahim antara kakitangan UMSKAL sambil membantu golongan yang memerlukan bantuan,” katanya.

Musnin berkata, kunjungan ke kampung itu dapat memberikan pengalaman baru kepada kakitangan



KAKITANGAN UMSKAL, Junainah Yunus (enam kanan) menyampaikan sumbangan kepada golongan asnaf di Kampung Bukit Kalam sambil diperhatikan Haji Kula Ghani (dua kanan) dan Musnin (tiga kanan).

mengenai keadaan fizikal dan ekonomi penerima sumbangan yang sememangnya layak menerima bantuan daripada jabatan dan agensi kerajaan.

Pada masa sama katanya, melihat keadaan rumah dan individu terbabit akan memberi keinsafan kepada

kakitangan UMSKAL yang lebih bernasib baik memiliki pekerjaan yang mampu menyara keluarga.

Beliau mengucapkan terima kasih atas kerjasama dan komitmen ketua kampung yang menjayakan program tersebut dan berharap hubungan baik dengan UMSKAL akan

berkekalan.

“Ia selaras dengan hasrat Naib Canselor UMS, Prof Datuk Dr Mohd Harun Abdullah, supaya UMSKAL mendekati masyarakat setempat terutama golongan yang memerlukan bantuan,” katanya.



PROGRAM Ziarah Ramadan telah merapatkan hubungan antara kakitangan UMSKAL.